

## **Naqqiut**

Akissuteqaat ulloq 10.november 2025-meersoq taarserpaa.

(Allangortinneqarpoq oqallisissiamut siunnersuummut akissuteqartup Naalakkersuisup taaguutaa Isumaginninnermut, Suliffeqarnermut, Nunamut Namminermut Avatangiisinullu Naalakkersuisoq taarserneqarpoq Isumaginninnermut, Suliffeqarnermut, Ilaqutariinnut Nunamullu Namminermut Naalakkersuisoq)

**Utoqqalinersiallit tamarmik toqqissisimasumik akilersinnaasamillu angerlarsimaffeqartinnissaat qanoq ililluta qulakkeersinnaaneripput pillugu apeqquteqaat aallaavigalugu oqallinnissamik siunnersuut.**

(Inatsisartunut ilaasortaq Bo Martinsen, Demokraatit)

### **Akissuteqaat**

(Isumaginninnermut, Suliffeqarnermut, Ilaqutariinnut Nunamullu Namminermut Naalakkersuisoq)

### **Siullermeerinnineq**

Naalakkersuisut siunnersuuteqartumut siunnersuut pillugu qujassuteqarput.

Naalakkersuisut utoqqaat tigoriaannarnik ikitsuinnarnik aningaasaatillit akilersinnaasuni najugaqarnissaanut periarfissaqassasut pillugit siunnersuuteqartoq isumaqatigaat. Ullumikkut utoqqaat ineqarnermullu aningaasartuutaannik ineqarnermut tapiissutinik aqqissuussineq aqqutigalugu tapersorneqarnissaat periarfissaareerpoq. Utoqqalinersiallit assersuutigalugu malittarisassat atuuttut malillugit ineqarnermut tapiissutinut immikkut ittumik ilanngaateqarput.

Sinnersuuteqartoq ilinniartut ineqarfii pillugit aqqissuussinermut innersuussivoq. Naalakkersuisut eqqumaffigeqquvaat, ilinniartut ineqarfiinut ineqarnermut akiliut 1990-it ingerlanerannili nalimmassarneqarnikuunngimmat, aamma ineqarnermut akiliut qaammammut 850 kr-inut aalajangerneqarluni. Tamanna isumaqarpoq, Namminersorlutik Oqartussat isertitatigut amigaateqarnikkut aserfallatsaaliuinerup matussusernissaanut annertuumik aningaasartuuteqartartut. Ukiumut aningaasanut inatsimmi ingerlatsineremut aserfallatsaaliuinerumullu pisariaqartunut aningaasartuutit matussuserniarlugit aningaasaliinerit annertuut immikkoortinneqartarput. Tamatuma saniatigut Namminersorlutik Oqartussat aamma ilinniartut ineqarfiinik nutaanik pilersitsineq pillugu akisussaaffeqarput aningaasartuutillu aamma annertusarlutik.

Naalakkersuisut ilinniartut ineqarfii pillugit ilusiliinerup utoqqarnut suliaassarfimmut nuunneqarsinnaanerata eqqortuuneranut aallaaviatigut isumaqataangillat. Utoqqarnut suliaassarfiup maannakkut ilusiligaanera

iluqaqtissarpassuaqarpoq, kommunit najugaqarfinnik, utoqqarnut innersuussutigineqarsinnaasunik, tak. inissianik attartortitsisarnermut peqqussut, pilersitsinissamut akisussaaffeqarlutik. Kommunit inissianik inuiaqatigiinni eqimattanut aalajangersimasunut qulakkeerinissamut periarfissaqarput, tassunga ilanngullugit utoqqaat. Taamaalillutik kommunalbestyrelsip nammineq inissiaatimimi inissiat immikkoortissinnaavai, inuiaqatigiinni eqimattanut aalajangersimasunut innersuunneqarsinnaangortillugit attartortillugillu. Kommunit najukkami pisariaqartisineq pillugu ilisimaarinnipput. Kommunalbestyrelsit utoqqarnut naammattunik inissaqartitsinerup qulakkeernissaanut, aamma kommunit utoqqarnut suliassaqarfimmuut pilersaaruteqarnissamut annertuumik akisussaaffeqarput. Taamaattumik maannakkumut ilusiliinermut tunngatillugu, utoqqaat naammattunik inissaannik innersuunneqarsinnaasut pillugit Naalackersuisut akisussaaffeqalissappata, annertuumik akuliunnerussiaaq, aamma utoqqaat immikkut ittumik ineqarnermut appassisumik akiliuteqartarnissaannut aningaasaliissutinik immikkoortitsisariaqassallutik.

Naalackersuisut maannakkumut isumaqarput, kommunit najukkami suliassanut pilersaarutinullu akisussaaffeqarnerat pitsaanerpaasoq.

Utoqqaat angerlarsimaffiat sunarpiaanersoq pillugu malittarisassaqaanngilaq. Tamanna nassuiarnissaanut kommunit ataasiakkaanut aalajangigassaavoq. Naalackersuisut naapertuunnerpaatut isigaat, utoqqarnut angerlarsimaffiit pillugit malittarisassat utoqqarnut tapersersuinissamut inatsisissami aalajangersarneqarnissaat. Tamatuma saniatigut Naalackersuisut tunngaviusutut isigaat, illoqarfinni annerni tamani utoqqaat najugaqatigiiffiannik pilersitsisoqassasoq.

Utoqqaat angerlarsimaffii pillugit malittarisassat utoqqarnut tapersersuinissamut inatsimmi aalajangersarneqarpata, peqatigalugu (DUT) aqutigalugu kommunit utoqqaat angerlarsimaffiit pilersitsinermut aserfallatsaaliuinemullu aningaasartuutit atorneqartut matussuserneqarnissaannut piumasaqarnissaannut tunngavissaqalissagaluarpoq, kommunit maannakkumut utoqqaat angerlarsimaffiit neqerooruteqarnermut aqqissuussinermullu piumasaqaatit nutaat malunnaatilimmik aimmikooruteqarpata. Tamatumunnga piumasaqaataavoq, immikkoortuni pilersaarutit pillugit piumasaqaataasussat aqutigalugit, kommunit utoqqarnut suliassaqarfiup pilersaarusiornissaannut pisussaaffeqalernissaat. Tamanna ilaatigut kinguneqassaaq, innuttaasut agguataarnerisa ineriartorneranni utoqqaat amerleriartornerat naammassiniarlugu, kommunit utoqqaat angerlarsimaffiit naammattunik sanaartortariaqartut. Tamatumunnga utoqqaat angerlarsimaffiit malittarisassat kommuniniillu DUT piumasaqaatit malitsigisaanik aningaasaqarnikkut periarfissaqarneq isiginiarneqarluni aalajangersaasoqartariaqassaaq.

Eqikkaaniaraanni, Naalakkersuisut utoqqaat ataasiakkaat akilersinnaasaannik inissaqarnissamut periarfissaqarnissaat pillugu siunnersuuteqartup pingaartut takorluugaanut aallaaviatigut isumaqataapput.

Naalakkersuisut isumaqarput, siunissami naammattunik angerlarsimaffeqarnissaq aamma utoqqaat timikkut inuttullu pisariaqartitaat naammassiniarlugit naleqqussakkanik angerlarsimaffeqartariaqarnissaat qulakkeerneqassasut. Tamanna anguniagaq utoqqarnut tapersersuinissamut inatsisissaq aqutigalugu ikorfartorneqarsinnaavoq.

Naalakkersuisut isumaqarput ilinniartut ineqarfii pillugit ilusiliineq utoqqarnut suliassaqarfimmut assinganik ilusiliiniarneq pitsaanerpaajunngitsoq.

Peqatigalugu Naalakkersuisut isumaqarput, ineqarnermut tapiissutinik aaqqissuussinerup maannakkut utoqqaat ineqarnermut akiliuteqartarnerannik tapersersoreerai. Utoqqarnut ineqarnermut tapiissutinik aaqqissuussinermi immikkut ittumik allanik mianerinnittoqassappat, Naalakkersuisut soqutigaat Inatsisartut matumani isumaat tusassallugit.

Naalakkersuisut oqallittoqarluarnissaanik kissaateqarput.